

Ч. 27. (62.)

Крыница, четверг дня 18. липня (5) 1935. Рок II.



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателів, котрі не ввели ще пренумерації, просимо вирівняти якнайскорше рахунки.

Також просимо присилати членські вкладки до Лемко-Союзу.

Пренумерата в краю:
 30 грошей місячно,
 80 „ квартално,
 1.50 „ полрочно,
 3 зл. рочно.
 В Америці: дол. фроніум
 В Чехословаччині:
 2 кор. місячно, 10 кор. полрочно,
 20 кор. рочно.
 Конто чекове № 404.155.

Перед выборами.

Ордынації виборчі до Сейма и Сената и закон [о виборі Президента Річипосполитой] сут уж через обі палаты ухвалені. П. Президент выдал зарядженє о закрытію незвычайной сесии Сейма и Сената с дньом 5. липня т. р.

Тымсамым теперешный Сейм и Сенат закончили свои работы и уж не сойдут ся на обрады. На осень сут заповіджены выборы на основі новой ордынації виборчой. По той виборчой ордынації, в осени будеме выбирати послов, але голосованє отбуде ся совсем иначе, як дотепер, бо буде ся голосовало на кандидатов, а не на листы. Кандидатов будут назначати колегии виборчи, зложены с представителей повітовых выділов, громад и других институций.

В каждом окрузі будут поставлены кандидаты через тоты виборчи колегии и буде можна голосовати лем на одного с них. Каждый виборчий округ буде выбирати по двоих послов, а таких округов утворят 104, в виду чого будучий Сейм буде числити 208 послов.

Який результат дадут нам тоты выборы, трудно предвидіти. Однак выборы по той новой ордынації не представляют ся для нас користо, бо помимо того, што лемков в краковском воеводстві выстарчило бы на выбор одного посла, новосандецкий повіт, прилучено до иншого округа виборчого, в котром нас єст 11 % а горлицкий и ясельский зас до иншого и там єст лемков 18 %. Лем на Лемковщині, належачой до львовского воеводства справа представляют ся лучше и там в повіті короснянском, сяноцком и ліском єст основанє вірити в выбор одного посла власныма голосами. В повітах ясельском, горлицком и новосандецком віріме однак, же при розумном поступованю можеме одержати оден мандат, если ввойдеме в компромис с якомси группом людей, котра в замін за поперте их кандидата

в одном окрузі, попре нашего в окрузі другом.

Без взгляда однак на результат выборов, одно повинно быти для нас певне и святе. Нам не можна ділити ся, ани провадити переговоров в ділі выборов, каждый на свою руку, але мусиме при выборах ити як оден муж разом. Если западе где рішенє, же лемкы мают отдати свои голоса на якогоси кандидата, то не сміє никто, ани агитовати, ани голосовати за кандидатом иншим. Крімі того мусиме станути до виборчой урны всі, так мужчины, як и женщины и всі мусиме отдати голоса на того самого кандидата, бо лем втотчас выборы тоты можут принести нам якуси користь. В першой мірі сусіды мусят нас цінити, яко добре организовану народну группу, мусят с нами числити ся, а крімі того тот, выбранный нашіма голосами посол, буде мати певны обовязкы в виду своих выбирателей.

Идучи отже до выборов згодно и разом, выносиме с тых выборов все певны користи, натоміст, если росорвеме наши голоса, то приближаючи ся выборы принесут нам лем шкodu.

Ци буде война в Африці?

Если в послідном часі не наступит даяке порозумленє то война италиянско-абисинска єст певна и выхукне за килька неділь. Нич дивного аджек, же политики робят всякы возможны пробы мирного уладженя діла.

Для Европы можут быти послідства той войны барз поважны, хоц она зачне ся в Африці и тому цілый світ интересує ся живо вшиткым, што діє ся межде Италиом и Абисиниом.

Так, як діла стоят тепер, выдає ся, же война

в Африці неизбіжна. Але не треба забывати, же события, котрых ждут вшиткы, не все наступают. За войном промавают передовсем приготовленя обох сторон. Не робит ся таких приготовлень, штобы пак не воевати. А если посчастливит ся запобічи войні, то лем за ціну уступств абисинских для Италии, котры бы отвічали тому величезному вкладови енергии и припасов, доконаному народом италийским.

Сто кнлькадесят тысяч войска выслала уж Италия до Африкы, а новы транспорты идут дальше. Идут уж цілы шпиталі войсковы. Дотеперешны выдаткы на тo тy выправу выносят уж понад миллиард лиров.

Аджек, або Италия достане уступства со стороны Абисинии, або война неизбіжна. Третьей возможности нїт.

Италия теперешна Мусолиного, то не тотта Италия с 1919 р. котру то нераз Франция с Англиом уміли перехитрити, особенно в ділі колоний. Положенє днешне, же два народы, т. є. Англия и Франция мают больше колоний, як им потреба, коли други молоды народы дусят ся на своей тісной территории, стає ся поволи так для Италии, як и для других народов не до выдержаня. Тому то Италия буде ити до конца, не оглядаючи ся ани на Лигу Народов, ани на Англию, ани на Францию.

Цільом, до котрой стремят италиянцы, єст одержати протекторат над Абисиниом и обезпечити собі рішаюче вліяне.

Абисиния со своей стороны готовится до войны, закупує оружие в Европі и бєсїдує, же николи не згодит ся на протекторат Италии.

Если так стоят діла, то мусит быти война, а однак много річей вказує на то, же однак до войны не дойде.

Ясне єст, же Италия воліла бы не провадити войну. Тепер действительность наказує Мусолиному быти неуступчивым, бо знає, же лем таким способом може найбільше выторговати. В послідном моменті, возможно єст, же одержит так великы концессии, котры позволят ему зрезультувати с войны. Был бы то великий успех.

Абисинія со своєю стороною не може ся надіяти нічого. Правда, абисинчики сут зарозумілы і памятаючи свою перемогу над італіанцями в 1896. думают, же и тепер дадут собі раду, хоц тепер положенє стало ся кус инше и Абисинія мусит конец-концом уступити в неровном бою.

Цисар Абисинії носить титул: „божой милостию король королей, намісника божия Ива Юды, сына Неба, найидостойншого пана землі и воды, владителя Етиопії, наймудрийшого, найдостойншого, одынокого наслідника престола Саломона“. Если он напавду має мудрость своего легендарного предка, то пойме, же лучше буде в дачом уступити без войны, як воєвати, або числити на помоч Лиги Народов. И именно тоты аргументы промавают против войны. В каждом случаю буде она висіти в воздуху через якийсь час. Але ци буде война, ци ні трудно ище тепер дати рішительный отвѣт.



Подберанє меду.

Пчолы не любят, коли ся им гребе в улю. Тому при подбераню меду треба мати всякы приряды при собі, штобы якнайскорше забрати плястры с медом и заложити порожны рамки.

До подкуряча уживати все дерево листкове. Треба мати короткий, снльный нож до розсуваня склеєных китом рамок, гачик до их высованя и выниманя. Обязовково треба мати запасны рамки, штобы их зараз вложити на місце забраных и два раз в улю не шпортати, бо пчолы любят покой. Ктоси с домашних мусит помагати пасічникам и относити плястры до медаркы.

Подберати мед можна лем в погодны дні, по выхненю росы, коли вшиткы пчолы робочи сут в поли. Если начало бы ляти, наближала ся буря и т. п., треба перервати подберанє меду, бо пчолы робочи перед дощом крыют ся до уля и злостят ся, же им ктоси мед заберат.

Люды, котры ся потят, не повинни робити при подбераню меду, бо пчолы пота не переносят. Найлучша одеджа для насічника єст долга кошель с грубого полотна и такы самы рукавичкы о одном пальци. Як таку одеджу носить ся все при роботі в пасіці, одеджа переходит запахом вошины и пчолы не звертают увагы на забранє меду. На голову одівати звичайну сітку.

Цілу роботу выконати скоро. Маючи вшитко под руком, можна в 10—15 минут закончити роботу в одном улю. При роботі потребна єст увага, штобы не прикусити пчолы. Голос, котрый выдає придавлена пчола єтт сигналом для цілого уля до заатакованя пасічника. Атака быват часами так сильна, же аж и смілый пасічник мусит утекати. Природно, был бы то великий встыд, если бы пасічник придавил пчолу-матку. Тому то неопытный человек, нехай лучше сам до уля не иде и там не шпортат.

Медарка має бути чисто вымыта и высушена. Плястры треба зараз зрізати долгим, барз острым пожом и давати до медаркы. Зрізати заклеплены плястры (лем такы бере ся до подбераня меду) буде легче огрітым ножом. В той ціли треба мати горячу воду и мачати в ней нож.

Найлучшом посудом на мед сут 4 литровы горнцы глиняны поливаны. Мед переходує ся в них барз добре. По килькох днях тре-

ба собрати зверха всяку нечистоту, кускы вошины и т. д. и овязати горнец папером. Переховати в холодном и сухом місци и стеречи от мышей, котры барз любят мед.

Поміщенє на медарку має бути отдалене от пасікы килькадесят кроков. Найлучше, штобы двери выходили на полноч. Панує там втотчас холодок, лучше робити и пчолы не пхают ся и не утрудняют работы.



Апостольский Администратор

в повіті ново-сандецком и горлицком.

Дня 1. липня выїхал наш Владыка в давный грибовский повіт в ціли переведеня там визитаций церковей. Был он во вшиткых селах давного грибовского повіта, розділеного тепер медже повіты ново-сандецкый и горлицкый. В часі визитации встрічано Апостольского Администратора радостно, — народ ставил ему вїздовы ворота с написами „Витай Владыко“ и многлюдно участвовал в богослуженях. Цілевы, переполнены словами Христовой любви, проповіді, выголошаны по церквах через Владыку, притягали к нему сердца вірных, в котрых вступат на ново віра в лучшу будущность.

По переведеню визитации, приїхал Владыка дня 12. т. м. в день св. апостолов Петра и Павла до Крыницы и ту отслужил архиерейске богослуженє и выголосил проповідь, выслухану многотысячном толпом людей, собранных на отпусті.

И ту невольню пригадала ся богомальцам выголошена перед трома роками проповідь епископа Коцыловского. Епископ Коцыловский метал втотчас с проповідальницы грома на наше руске населенє и на уряджаны нами Талергофскы Свята, в котрых наш народ отдає честь невинным жертвам звірства бывшего австрийского режима, тым найліпшим сынам русского народа, котрых лем прото, же они не отрекли ся віры и назвы своих славных предков, переслідовано, мучено по тюрьмах и лагерях, рубано и вїшано. Против молитвы за души тых Мучеников выступил втотчас епископ Коцыловский в своей переполненной ненавистью проповіді и тотта проповідь роз'ярила так сильно собранный народ, же люды с проклятем выходили с Божого Храма и не находили слов порыцаня для своего тогдашного архипастыра.

Як же инша была проповідь, выголошена тепер до тых самых богомольцов нашим Владыком. Апостольский Администратор в своей проповіді завывал собранных до любви и згоды, котра злучит нас в одно. Як в каждом господарстві мусит бути господар, котрого всі слухают и выполняют его приказы, таксамо и в Церкви мусит бути наставник, котрому всі вірны мають ся подчинити. Тым наставником єст наслідник Христа и под его знаменем мають ся вірны групповати и лучити, а присвічаючом вірным идеом має бути християнска згода и братня любовь. Слова, достойны великого служителя науки Иисуса Христа вызвали у богомольцов вдовленє и радость и засіяне зерно выдаст напевно добры результаты. Пополудни Владыка выїхал до Жегестова, где переночовал и слідуемого дня отїхал до Рыманова.

На отпусті в Крыници.

Уж от рана в четверг перед св. Петром приїзжают возы, наладованы ріжными крамами, котры раскладывают коло дороги, недалеко церкви в Крыници. Часто крамары вадят ся медже собом о місца и чути их голосны крикы. Вадят ся также и численны діды и калікы, бо каждый хоче заняти місце при вході до церкви.

По полудни начинают горнути богомольцы. Приходят с процесиями „залісяне“ и розміщают ся по хатах наших газдов. В попередних роках приїзджало дуже с „Венгер“, лемков с пряшевской области, котры своими стройными фигурами и прекрасными нарядами, отбивали ся ярко медже группами богомольцов. В том році они не приїхали. Але и так дороги и площи в Крыници заполняются скоро и повстає шум и крик, як на торзі, котрый увеличат ся с каждым годином, аж до полудня в день самого праздника.

Діти выигрывают на пищалках и трубках, свищут на свистках, або стріляют с деревяных стрільб и бляшаных страшаков.

Торговцы выкрикуют на ціле горло и захваляют свои товары. Там дальше грают цыганы коло карузели пожарной сторожи крыницкой.

Аж нагло бют торжественно дзвоны, шум тихне и люды горнут до церкви — тиснут ся вшиткы, бо то днеска правит Службу Богу сам Владыка, Апостольский Администратор Лемковщины. При Службі Божой співат чудесно крыницкый хор. Але церкв, хоц велика, не може помістити ани части собраного народа и полно людей стоит коло церкви. Молитвы их перерывають голосны крикы калік, просячих милостыню. Днешный день для них добрый. Богомольцы часто сягают до кышени и обділяют калікы, котры просят Бога о благословенє для своих жертводателей.

Коло другой години кончит ся богослуженє и увеличат ся наного шум на улицах и площах. Дакотры люды сідають в тіни дерев и бесідуючи о том и тамтом, ідять мериндю.

От там на горбку, недалеко шавы, видно группку брунарян. Сідит солтыс, г-н Войтович, чоловік розумный, добрый газда, котрый был долгы літа в Америкі, виділ не одно и неодному ся научил, в товаристві своих сусідов. Ідять принесену с собом мериндю, попивают крыницком шавом, отпочивают и бесідуют. Г-н Войтович отзывает ся до сідающего коло него Василя Т. — Слушайте сусіде — вы также хлоп мудрый, мусиме мы взяти ся у нас, в Брунарах иначе до работы и газдованя. Мы не будем тратити часу на споры и дискусии религийны, бо мы маме свою добру религию и той будем ся тримати. Я был в Америкі и виділ дост тых споров. Але тепер там уж люды помудріли изрозуміли, же тоты споры нас ділят, а нам треба єдности. Не можеме также оглядати ся на ничию помоч, бо не поможет нам напевно ани Ваньо Гунянка, ани Д-р Семан Пыж, котры правда, барз гарді пишут и бесідуют о біді нашего работника, хлопа-лемка, але сами доробили ся на той біді грубых грошей, а работник бідует ище больше. Мы мусиме сами дбати о себе и старати ся не политыком, але постоянным трудом и зміном способа газдованя увеличити наши доходы.

— Та добре бы то было, рече Василь, начати иначе газдовати и ліпше жити, але штож мы сами зробиме?

— Зробиме и то дуже, лем попродайме наши коні, котрыма и так задармо жидам дерево возиме, а того, што жре конь, дайме коровам. Як будеме коровы добре ховати, то обробиме нима наши поля и будеме мати дост молока.

— А што зробиме с тым молоком, кед нїт єго кому продати? сказав заз Василь.

— И на то єст рада, лем треба, жебы мы вшиткы взяли ся разом до діла. Заложиме собі уділову молочарню, до котрой будеме носити молоко, котре в молочарні переробят на масло и продадут за добры гроши и нам за молоко виплатят. При молочарні оживит ся также кооперативный склеп, в котром каждый член молочарні и кооператыва достане товар, за котрый заплатит при виплаті грошей за доставлене до молочарні молоко.

— Та то барз проста річ — гварил Василь, дивне, же мї то самому до головы не впало. Так, так, сусіде, треба ся конечно взяти до организации села, бо тота ваша мысль барз ся мї подабат.

Але ба, вставайме уж, бо видите, же люды уж ся поросходили и сонце низко. Скоро встали вшиткы и долго по дорозі бесідовали ище о користях с молочарні и кооператыва. Судячи с их поважных лиц, можна сміло вірити, же Брунары переведут в себе тото, што задумали. Помагай им Бог в наміренном, добром ділі и дай Бог, штобы в каждом селі были такы солтысы, котры бы думали и хотіли посвятити свой труд для улучшения економичного положеня наших сел.



Русальники на Волини.

Дивному обрядови приглядало ся около 300 зрітелей в селі Святе повіта здолбунского.

В воді ріки Горынь занурило ся по пояс 11 мужчин и 9 женщин. Над берегами ріки одітый в литургичны шаты стоял наставник русальников и уділял благословеня зануреным в воді, котры таким способом принимали крещенє. Обряд тот odbyват ся звычайно в часі Зелених Свят (Русаль) и прото называют их зеленосвятителі (русальники).

Секта тота єст на Волині, одном с найчисленнейших спосеред 40-ох сект, які там существуют. Секта тота не узнає єрархии духовной.



Корабель перерізаний на половину.

На водах японских мала місце велика катастрофа, котрой жертвом пало 140 людей.

Два кораблі наїхали на себе так несчастно, же оден с них был перерізаний праві на полорину и утонул в продолженю 8 минут, потягаючи в глвбину тых, котры не потрафили отплынути с місца катастрофы. Выратовано 113 люда, а 140 утонуло.



Кырвавый шал работника.

До Здунской Волі повіта лодзкого вернул недавно с Німеччины рольный работник, Антоний Михель.

Сусіды спостерегли у него признаки умственной хвороты, назагал однак Михель был спокойный и єго манияцтво не было грозне для никого. Перед килькома днями по выпитю одной фляшкы палінкы и непрерываной ночи Михель попал в шал. Выкликал авантуру с женом, пак шмарил ся на ню с ножом и начал наносить удары. Дочка и сын начали через окно кричати о помоч, а втотчас шаленый начал гнати за нима по комнаті. В оден момент посмолтріл на лежачу на землі, покырвавлену жену и опритомніл. Перестал гнати за дітми, приказал им выйти с комнаты и повісил ся на ремени, присиленым до клямкы.

Закликаний лікар потвердил смерть Михеля, а тяжко покалічену жену уміщено в шпиталю.



Гром убил хлопа и ноня.

В середу, дня 10 т. м. сорвала ся в Крыниці и околиці вечером сильна буря с блискавицами и громами. В том часі вернул с заработка Дмитро Полянский и поїхал на коню в поле, штобы напасти єго через ночь и на другой день знова пойти на заробок. В полю застала єго буря и он вертал до дому. Коло приходского дома ударил єго гром и убил єго и коня на місци. Смерть послідовала моментально, бо ани не потрафил вытягнути ноги с под переверненого коня. Найдено єго аж на другой день рано.



За ганьбу дочки жена убила мужа.

В Стухні под Лодзьом убито ударом соковы в голову Франца Ринга. Яко подозрілу о убийство арестовано єго жену. Жена признала ся до провины, подаючи незвычайны мотывы. Муж от долшого часу мал кырвомісны сношеня с 23-х ліпном дочком, котра сподіват ся тепер дітины. Коли вшиткы персвазии не помогли, Рингова рішила убити мужа, штобы не покрывати грішных сношень.



Не хотячи переіминити ся в мужчину, молода чешка повісила ся.

До одного шпиталя в Празі привезено труп 26-літної служащой, Павлины Грабак, котра повісила ся в дому своей хлібодателькы. Лікарскы оглядины выказали, же дівчина находила ся в стані заміны на мужчину.

Слідство в том ділі дало цікавы результаты, Грабак в осени мала выйти замуж. Раз по обудженю, спостерегла, же на єй тілі повстают якісы дивны зміны. Пошла до лікара. Тот перевел операцию, але переіміна на мужчину поступала дальше. Дівчина начала бановати, не хотячи остати мужчином, аж рішила пополнити самоубийство. Нлчала частично трути ся сольном кыслотом. Коли тото не помагало, рішила

отобрати собі жите радикальным способом Книжечку щадничу на 500 корон ч. переслала сестрі, до хлібодателькы написала лист, в котром описала єй, што ся случилось и як страшно ся боит, же остане мужчином. Оділа ся празднично и повісила ся.



НАШОМУ ПАРОВСТВУ.

Ей вы хлопцы, ей молодцы
Из нашего краю,
Возте ся за ліпше діло,
То вас не поганю.

Як ся не опамятате,
Буду вас ганити,
Гдеж то ладно оден с другим
Все ся лем вадити.

Ци то в корчмі при забаві,
Ци в церкви во свято,
Позерате на ся остро
И страшно завзято.

Преця могли бы вы все ся
Дружно заходити,
А вы с ножом, або с палком,
Штобы ся лем бити.

Кобы вы познали правду
И світло науки,
Взяли бы вы собі книжку,
А не палку в руки.


Ей, бо с книжком ци газетом
Каждый вас похвалит,
Але с палком, або с ножом
Все лем вас поганит.

Бо вы часом хлопцы ради
Быти барз завзяты.
Ци то кривый, ци горбатый,
Палку мусит мати.

Як на книжку до читаня,
То пінязей нема,
А под носом закопчено,
Дым горне до неба.

Спамятайте ся паробкы
Шмарте гнів и злобу,
А возте ся до науки,
Поширайте згоду.

Юрий Бодак с Вапенного.



ПОМІЩАЙТЕ
ОГОЛОШЕНЯ
В ГАЗЕТІ „ЛЕМКО”

СПРОСТОВАНЄ.

Високоповажаний Пане Редакторе!

В числі 25 (60) часопису „Лемко” з дня 4 липня 1935 р. на сторінці 3-й поміщено допис, в якому дописувач, підписаний як „Старий Лемко” пише, що молодий лемко Емилиян Поливка з села Ростока Велика дістав від Українського Комітету Допомоги Лемківщині у Львові суму злотих 200.— для роздачі тим бідним, котрі потерпіли від зливи і що з тих грошей взяв для себе злотих 100.—, а між бідних розділив лише 100.— злотих.

Як секретар комітету, який вислав гроші на допомогу Лемківщині, стверджую, що допис видрукований у Вашому часопису не правдивий. П. Емилиян Поливка одержав від Українського Комітету Допомоги Лемківщині у Львові лише 100.— (виразно: сто злотих), а не 200.— злотих. Одержаних 100.— зл. п. Емилиян Поливка розділив згідно з волею Комітету. Допомогу дістало 43 мешканців села Ростока Велика. Спис тих 43 мешканців, котрі допомогу дістали, з докладним поданням хто кілька дістав з власноручними підписами тих, котрі допомогу дістали, одержав наш комітет ще 29 січня 1935. Спис той с потверджений урядом громадським села Ростока Велика, підписаний п. Начальником Громади та чотирма свідками, які становили Місцевий Комітет, котрий розділював допомогу.

Для публічної контролю наш комітет оголосив при кінці квітня місяця б. р. спис всіх громад, котрі одержали допомогу з поданням суми тої допомоги. В тому списку Ви самі можете перевірити, що Ростока Велика одержала від нашого Комітету лише злотих 100.—, а не 200.— зл.

В ім'я правди прошу видрукувати у Вашому часопису це моє спростовання.

З правдивим Поважанням
Михайло Матчак
Посол до Сойму.

У Львові 5. липня 1935 р.

Спростованє посла Матчака поміщаме без змін. Со своєю сторони однак замічає, же посол Матчак помилує ся, бо Емил Поливка достал 200 (двіста зл.) запомогы, о чом свідчит нотатка, поміщена в 4 ч. „Нашого Лемка” п. з. „Подяка”, в котрой мнимый комітет роздільчий (такового не было) дякує за двіста, а не за сто злотых. Тому пане посол, трудно вам буде выбілити того, што чорне и лучше той справы больше не трогати.

ТРАДИЦИЙНЫЙ ТАНЦОВАЛЬНЫЙ
ВЕЧЕР, КОТРОЙ УСТРЮЮТ РУСКИ
СТУДЕНТЫ В СЯНОКІ,

СОСТОИТ СЯ ДНЯ

3. серпня 1935 р.

В САЛІ НАРОДНОГО ДОМА.

Комитет просит всіх руских людей
явити ся численно. Запрошеня можна
достати от Комитета при касі
в день забавы.

КОМИТЕТ.

В РОСТОЦІ ВЕЛИКОЙ, НОВОСАН-
ДЕЦКОГО ПОВІТА

ОТБУДЕ СЯ

ДНЯ 28 ЛИПНЯ 1935 р.

О ГОД. 2-гой ПОПОЛУДНИ

Открыте Читальні

имени Мих. Качковского,

НА КОТРЕ ТЫМЧАСОВЕ ПРАВЛЕНЄ

ПРОСИТ ВСЮ РУСКУ ИНТЕЛИГЕН-

ЦИЮ, ОБЩЕСТВА, ХОРЫ И ОР-

КЕСТРЫ С ДООКРЕСТНЫХ СЕЛ.

ПОЧТОВЫЙ ЯЩИК:

Село Складисте пов. новосандецкий: Дописи не можу помістити, бо ніт подписи дописчика. Если хотите, чтобы допись помещено, прошу додатково написати, кто єст автором дописи и ручит за правдивость наведеных фактов.

Г-н Іоан Констанкевич Святкова Мала. Прошу подати, от коли корова мала червонку (кырваву моч) и напровадити на тот факт свідков.

Што чути в світі.

В Росии открыто новы богатства минеральны и так: Богаты поклады угля и соли открыто на всходном побережу полуострова Тамира. Має то велике значеиє для ловлі рыб, бо там не было соли. В окрузі Сталинградском, в рейоні Чорный-Яр нашли ропу нафтову, в землі Памирской и Таджики открыто поклады угля, котры обчисляют на 26. миллионов тон. В республикі Баскирской окрыто поклады золота, в долині рікы Ангары, недалеко Ташкента мідь, в окресности Сталинобада нафту.

В Болгарии выбухнул пожар в склепѣ с оружіем. В коротком часѣ запалил ся также магазин с выбуховыма материялами. Склад с порохом вылетѣл в воздух. Двох стражаков убитых, семох тяжко раненых. Раненый также оден полициянт и много прохожих.

До Австрии вертают Габсбургы. Родина их має вернути до Австрии и замешкати в Райхенау. Братя Оттона мают кончити студия в Відні. Маєток має вернути Габсбургам Австрия 1 січня 1936 р. Газеты Францускы заповѣдают, же поворот Габсбургов до Австрии утревалит мир в Европі.

В Амерыці, в державі Нью-Йорк, была страшна злива. Згинуло 33 люда, а тысячи людей находит ся без даху над головою. Страты обчисляют на 10 миллионов долларов.

А Амерыці находит ся по переведеной статьистѣ всего лем шест миллионов чужинцов, то єст таких, котры не мают американского права гражданства.

Президент Рузвелт подал конгресу свое поданє, в котром жадат, штобы долги по „Ню Дил” сплатити с оподаткованя американских богачей.

Президент Ельского университета выголосил бесѣду, в котрой доказал, же комунизм мусит упасти, а если дотепер в Росии держит ся, то лем сильным терором.

Италянскы газеты доносят, што Англия концентрує недалеко Абисынии 100.000-чну армию и что в случаю войны, не думат быти нейтральном.

В Росии вводят латинску азбуку. До того часу 59 племен, жиющих в Росии, котры числят разом около 20 милнонов жителей ввели уж у себе латинску азбуку.

В Афганистані жиє старец по имени Ма-рагуи, котрый числит 200 літ. Єст то віро-ятно найстарший человек на світі.

В Росии советской приготавлиют реформу констытуции.

Литва будує нову дорогу, котра має пол-чити Ковно с Вильном. Ватыкан заохочат Литву до навязаня добрых отношен с Поль-щом.

В Урвиль коло Метцу продают замок, котрый перед войном належал до до Вильгельма II.

Япония перазначила 48 миллионов єн на реорганизацию своих летничих сил.

Румынов прибыло в 1934 р. 0221.726 лю-дей, и Румыния числит тепер перешло 19 миллионов жителей.

Вісти с краю.

В Польщі будут новы школы, а именно гимназии купецкы и промысловы. Вписи до тых гимназий мают назначити поодынокы Куратории школьны.

Задержанє екзекуций податковых в часѣ зерняных работ зарядили Палаты Скарбовы. Вздержаны мают быти екзекуции в часѣ от 15 липня до перших дней серпня.

Безпартыйный Бльок змінят свою назву на иншу, именно буде называти ся: „Związek Pracy Społecznej”.

В Варшаві арестовано 17 комунистов за поширяне комунистичной бибулы.